

Bouônjour, bouonnes gens ch'est Aline Cattermole tch'a l'pliaîsi dé vos pâler acouo eune fais aniet lé tchînze dé Juîn 2024.

Y'a deux s'maines j'tais en Jèrri pour un long but d'la s'maine. Eune anminne m'avait invitée à sa fête d'anniversaire et bein seux j'vîns! J'tais tout à fait rêjouie à l'idée d'èrtouônner en Jèrri trais ans auprès qu'j'avais tchitté l'île. J'tais émutionnée étout car j'pâssis pus d'dgiêx ans en Jèrri et un tas d'magnifiques choses s'adonnîtent ichîn: mes neuches, la naissance dé man fis et bein seux man travas à l'office du Jèrriais. I' y'eut étout l'achat d'eune maison, les rencontres dé nouveaux anmîns et d'collègues, tchi d'vîntent des anmîns. Vraîment Jèrri est, et restétha tréjous eune pliaiche hardi espèciale pour man bouônhomme et mé!

J'èrvisitis l'île y'a deux ans duthant l'Èté mais i' fut eune hardi courte visite pour lé travas. Y' avait raïqu'un an qu'j'avais tchitté l'île, pourtant, j'tais râvie d'vaie combein qu'St Hélyi avait changi en eune année. Des tas d'nouveaux grands bâtisses aue eune architectuthe hardi moderne avaient crû, certains des offices d'aut' des appartéments. J'ai ouïe qu' ches nouveaux bâtisses né sont pon du goût dé tout l'monde! Pourtant j'crai qué quand nou-s'arrive par baté à la caûchie Lîzabé et qu'nou vaie les bâtisses au liain, St Hélyi sembl'ye hardi moderne, et i' donnent un îmage positi.

Lors dé ma dreine visite j'fus hardi gâtée par lé temps. Le solé liêthait, la tempéthatuthe 'tait dans les dgiêx-huit degrés et i'vent n'sûfliait pas trop fort, en tout cas i'n'ventait pon la pé du dgiabl'ye!

Lé weekend incliut la visite dé la montréthe "Bouan Appétit" tchi 'tait hardi intéressante. S'ou n'l'avez pon acouo veue j'vos r'quémande d'y aller. L'Héthitage dé Jèrri a ieu la bouonne idée d'imprimer des feuillets aue des r'chettes Jèrriaises comme par exempl'ye les pais au fou, lé nièr beurre, les mèrvelles ou l'pain à caboche. J'crai qu'ch'est eune magnifique idée car les r'chettes Jèrriaises ouaithe qué d'licieuses né sont pon assez connues. J'm'en vais éprouver à graie les pais au fou dans un pot en terre, il'ont un goût d'èrvas-y, et i'sont un fricot économique pour la fanmil'ye.

Eune aut' chose intéressante dé man viage fut eune prom'nade à la Corbière et lé tou d' la veue. L'us 'tait ouverte et nou pouvait entrer, p'têt qué ch'tait à l'occâsion du chent-chinquantchième anniversaire. Les visiteurs pouvaient marchi alentou d'la veue.

Eune chose intéressante qué jé n'savais pon 'tait qu' la veue fut alluenmée pour la preunnié fais lé 24 d'Avri 1874. Y'avait 4 gardgiens tchi travaillaient duthant deux jours châtchun san tou.

Y'avait du bieu solé et j'eus la chance dé vaie un banc d' pourpais. Y'en avait des grands et des p'tchiots, à saûtiquer dans les louêmes. Tchi spèctacl'ye rêjouissant! Ch'na m' ramémouaithit comment qu'Jèrri est un p'tit paradis quand l'solé lit!

Enfin jé n'pouvais pon tchitter l'île sans visiter tchiques cafés et restaurants! J'mangis un dinner à Sand, tchi soulait s'app'ler Big Vern quand jé d'meuthais en Jèrri. I' sèrvent d'la nouôrrituthe du monde aue un tas d'options végétariennes et véganes. J'tais heûtheuse dé vaie qu'il' offrent d'la limmonade graie en Jèrri aue un grand chouaix dé difféthent goûts. J'vos r'quémande la linmonade ès frâses, tchi goût d'èrvas-y!

Un aut' restaurant qué j'visitis 'tait lé café à Bouonne Niet. La nouvelle êtchipe dé couques continuent à sèrvi d'la nouôrritithe asiatique parmi d'aut'choses. Bein seux jé chouâisis lé crabe dé Jèrri. I' tait graie dans un curry pon trop êpicé, parfait pouor gouôter lé goût du crabe!

J'attends fête ma préchainé visite en Jèrri duthant lé S'tembre. J'viag'geai à l'occâsion d'la visite, j'm'en vais l'dithe en Français, du "conseil scientifique des parlors normands" sus l'île lé 18 et 19 dé septembre dé ch't'année.

J'espéthe qué j'verrai un tas d'Jèrriais qué j'connais. Et bein ch'est tout pouor aniet. Mèrcie bein des fais pouor m'aver êcoutée et à la préchainé!